

est, paruumque oppidum à paucis incolis habitatum. Patrophili huius Episcopi sæpè fit mentio apud authores historiae Ecclesiasticae, numeraturque inter Arij defensores à Theodoro, licet Concilio Nicano inter alios Episcopos subscripserit. Valens etiam legitur in Sardicensi, Saturninus in Constantinopolitano primo, Olympius in Chalcedonensi, Theodosius in Constantinopolitano sub Agapeto & Menna, & Hierosolymitano sub iisdem.

VIII.
PETRA METROPOLIS
TERTIAE PALESTINAE.

a D. Athan. in ep.
ad Sol.

Petra Metropolis tertiae Palestinae, ciuitas munitissima in monte sublimi sita ad fines Moab, apud Ptolemæum legitur in descriptione Arabiae Petrae. Arcen & Arcen Iosepho dicitur, & aliquando Archim teste Vvifsemburgio. Aliaque est à Petra Palestinae, quæ sedes Episcopalis tantum fuit, vt clarè probatur ex D. Athanasio, qui Asterium Petrae Palestinae Episcopum vocat, & Arium Petrae Arabiae. Dicitur autem in duabus Notitijs Græcis antiquis Metropolis tertiae Palestinae, reueraque fuit, non paucas ciuitates Episcopales sibi subditas habens, vt ex ipsis inferius patebit.

IX.
HIEROSOLYMITANVS
PATRIARCHA PROPRIA
CA RVIT PROVIN-
CIA.

An autem Hierosolymorum Patriarcha Suffraganeos sibi nullo medio subiectos habuerit, si petas, id multas ob rationes nobis valdè dubium esse ingenuè fatebimur, saltem per huius Notitiae tempora. Quis enim eius conditionis prouinciam vllò in antiquo codice reperijt? Antiqua certè est huiusce Patriarchatus Notitia Græca, quam ex Vaticano in secunda huius operis parte dabimus: Sed non nisi tres in ea Prouinciæ leguntur, Caesarea, Scythopolis, & Petra, in quibus Hierosolymitanus Antistes non Metropolitica iura, sed Patriarchalia exercebat, nullis ei proprijs assignatis sedibus Episcopalibus, circa quas Metropolita curam gereret. Scio equidem posterioribus sæculis tres huic istiusmodi sedes subiectas extitisse, nimirum Bethleemitanam, Ebronensem, & Lyddensem: sed aliter sex prioribus sæculis rem se habuisse ex hoc satis colligitur, quod apud Bethleem nullus tunc sederet Episcopus, nullaque eius in antiquis Notitijs memoria sit. Commune sane fuit tribus primis verisque Patriarchis propriam regere Prouinciam: & ratio est, quod ab initio totius regionis in qua sedebant ipsi essent Metropolitæ. Sed longè diuersa fuit duorum recentiorum conditio, Constantinopolitani nimirum & Hierosolymitani, qui cum ex prima institutione Metropolitæ non essent, id authoritatis nonnisi post multa sæcula sortiti sunt; sed tantum dignitatem seu authoritatem eminentem, qua cæteris præcellerent, vniuersamque diocesim Patriarchalem superiori iure administrarent. Istud de Constantinopolitano superius probauimus: de Hierosolymitano verò res tantò certior est, quòd vicinae omnes Hierosolymis Episcopales sedes alicui ex tribus supradictis Metropolitis in antiquis Notitijs Græcis subiectæ reperiantur. Quæ autem sub vno quoque antiquitus fuerint, in Notitia ex Concilijs historiaque Ecclesiastica extrahenda mox subiungemus, sed prius huiusce Patriarchalis sedis Episcopos per ordinem recenscamus.